

ARREST DON-  
NE' PAR LE ROY EN  
son Conseil, avec Lettres de  
Declaration dudit Seigneur  
sur la Reuocation du droit  
Annuel.



A PARIS,  
Chez F. MOREL, & P. METTAYER,  
Imprimeurs & Libraires ordinai-  
res du Roy.

---

M. DC. XVIII.  
*Avec privilege de sa Maieſte.*

ALL WEST DOB

THE R. L. ROY IN

THE R. L. ROY IN

THE R. L. ROY IN

THE R. L. ROY IN

THE R. L. ROY IN

duplicate

not cataloged

THE R. L. ROY IN

THE R. L. ROY IN

THE R. L. ROY IN

THE R. L. ROY IN

THE R. L. ROY IN

THE R. L. ROY IN



# EXTRAICT DES Registres du Conseil d'Estat.



LE ROY s'estant  
faict représenter  
en son Conseil,  
les Arrests & let-  
tres patentes ex-  
pediees sur le su-  
ject de la dispense des quarante  
iours accordée à plusieurs de ses Of-  
ficiers, moyennant le paiement du  
droict Annuel, auquel ils feurent  
pour ce taxez: ensemble les Cahiers  
des Estats Generaux tenus à Paris,  
par lesquels sa Majesté a esté tres-

instamment suppliée de reuocquer  
 ladite dispense des quarante iours,  
 & oster la venalité des Offices. Veu  
 aussi l'Arrest dudit Conseil & let-  
 tres expediées sur iceluy, par lesquels  
 sur la treshumble remonstrance que  
 lesdits Officiers auroient faicte à sa-  
 dite Majesté, contenant que par  
 deux Arrests donnez en sa presence,  
 ladite dispense leur auroit esté ac-  
 cordée pour six ans, qui ne deuoient  
 expirer qu'à la fin de l'année mil six  
 cens dix-sept, Sadite Majesté leur  
 auroit continué ladite dispense ius-  
 ques à la fin de ladite année mil six  
 cens dix-sept. Et veu aussi l'aduis sur  
 ce donné à sadite Majesté par l'as-  
 semblée des Notables tenuë en la  
 ville de Rouen: LE ROY ESTANT  
 EN SONDIT CONSEIL a reuocé &  
 reuoque à tousiours ladite dispen-  
 se des quarante iours & droict An-



nuel, sans qu'il puisse cy-apres estre restably & remis en quelque temps, & pour quelque cause & occasion que ce soit: se reseruant neantmoins sadite Maiesté, de recognoistre la vertu & le merite de ses Officiers, qui auront exercé leurs charges avec entiere reputation d'integrité & suffisance, soit de leur viuant en les promouuant à plus hautes charges, soit apres leur deceds en gratifiant leurs veufues & enfans, sur le prix de leurs offices, en cas qu'ils decedent auant les quarante iours. Et pour le regard de l'interdiction de la venalité des offices, encores que sadicte Majesté ait intention d'y pouruoir, le iugeant necessaire pour le bien public; Neantmoins pour gratifier seldits Officiers, & leur donner quelque loisir d'accommoder leurs affaires, & à sa Maiesté le

moyen de trouuer le fonds pour  
remplacer ses parties casuelles: Sadi-  
te Maieſté a-encores voulu differer  
l'effect de ladite interdiction de ve-  
nalité. Et pour l'effect & execution  
du present Arrest, veut sadite Maieſ-  
té que toutes lettres necessaires en  
soient expediees, & publiées en sa  
Chancellerie de France. Faict au  
Conseil d'Estat du Roy tenu à Pa-  
ris; le quinziesme iour de Ianuier  
mil six cens dix-huit.

Signé, DELOMENIE.



OVIS PAR LA GRACE DE  
DIEV, ROY DE FRAN-  
CE ET DE NAVARRE, A  
tous ceux qui ces presentes Lettres  
verront, Salut. Entre les remon-  
strances & requisitions qui nous  
ont esté faictes par les trois Ordres

& Estats generaux de nostre Royau-  
me, assemblez en nostre bonne ville  
de Paris, Il n'y en a point dont ils  
ayent faict poursuite avec plus gran-  
de instance, pour y obtenir prompte  
prouision & remede, que de la re-  
uocation du droict Annuel, inter-  
diction de la venalite de tous Offi-  
ces, tant de Iudicature que de Finan-  
ce, dont le prix a accoustumé d'en-  
trer en nos parties casuelles, & de la  
suppression par mort de tous lesdits  
Offices, iusques à ce qu'ils soient re-  
duis au nōbre porté par l'ordonnāce  
de Blois. Ce sainct & louable desir  
ayant aussi esté en nous deslors que  
nous sommes venus en aage de pou-  
voir discerner & cognoistre ce qui  
estoit vtile & dommageable à nous  
mesmes, à nos subiects, & à nostre  
Estat: Apres auoir consideré que par  
ce moyen le choisis nous estoit osté

d'esleuer aux charges, honneurs & dignitez, ceux qui par leur integrité & suffisance s'estoient rendus capables d'y paruenir, s'ils n'employoient tout leur bien, & le plus souuent le credit de leurs amis, pour les acheter à vn prix excessif, auquel le droict Annuel les auoit faict monter, & que la multitude d'Officiers, que la corruption des mœurs, & les necessitez aduenues en ce Royaume en diuers temps, auoient faict croistre d'année en autre iusques à vn nombre presque infiny, estoit aussi cause d'un grand desordre & confusion en la Iustice, & en l'administration des Finances, & de les faire mespriser, au preiudice de nostre auctorité, & à la diminution de l'honneur & respect qui est deu à leurs charges. Ceste assemblée d'Estats generaux ayant encor adiousté à leur suppli-



Supplication tous ensemble d'une  
 mesme voix & volonté lors qu'ils fu-  
 rent prests de se separer, qu'il nous  
 pleust reformer tous lesdicts abus au  
 mesme instant, & par vn Edict parti-  
 culier qui fut perpetuel & irreuoca-  
 ble, sans attendre la responce qu'ils se  
 promettoient deuoir estre faite avec  
 quelque temps & loisir à plusieurs  
 autres articles contenus en leurs ca-  
 hiers & remonstrances: Ce qui leur  
 fut aussi accordé par nous, avec pro-  
 messe solennelle d'en faire l'Edict au  
 mesme temps, & sans remise, com-  
 me il fut faict: Mais ayant peu de  
 iours apres entendu les remonstran-  
 ces de nos Officiers, qui nous au-  
 roient representé la continuation  
 du droict annuel leur auoir esté ac-  
 cordee pour six ans, par deux arrests  
 de nostre Conseil donnez nous pre-  
 sens, lesquels six ans ne deuoient ex-

pirer qu'à la fin de l'année mil six  
cens dixsept, & que si la venalité  
estoit ostee tout à coup avec le droit  
annuel, ce seroit incommoder plu-  
sieurs bonnes familles de nos offi-  
ciers qui auroient achepté leurs offi-  
ces à prix excessif : l'enuoy & la pu-  
blication dudit Edict auroit esté  
differee iusques à ce que ledit temps  
fust expiré, afin que nos Officiers  
eussent moyen & loisir de pourvoir  
à leur interest particulier, par ceste  
grace acceptee lors d'un chascun,  
avec grand contentement & remer-  
ciement. Ce qui nous faisoit esperer  
qu'ils embrasseroient à present avec  
nous ce qui est deu au public en cest  
endroiect, comme a faict la derniere  
assemblee de Roüen, en laquelle le  
mesme Edict faict au temps de l'as-  
semblee des Estats de Paris, fut re-  
presenté, veu & leu: mais le contrai-

re est aduenü par les plaintes qu'ils continuënt & repetent de iour en autre, sous le nom general de tous nos Officiers, encores que ce soit contre le gré & volonté de plusieurs d'entre eux, qui ont considéré sagement les raisons cy-dessus desduites, & que la conscience & le deuoir les obligeoit d'auoir plus de soing de l'vtilité publique, en laquelle eux, leurs enfans, & leur posterité auroient part, qu'à leur interest particulier, dont nous desirerions d'amoindrir le dommage, si ce n'estoit que nous sommes obligez de preferer à ceste consideration le bien general de nostre Royaume, & que ne deuons priuer nos Estats Generaux du fruit & effect qu'ils ont esperé de leurs requisitions & de nos promesses. A CES CAUSES, Sçauoir faisons, qu'apres auoir mis ceste af-

faire en deliberation en nostre Conseil, auquel assistoient aucuns Princes de nostre sang, autres Princes, Ducs, Pairs, Officiers de nostre Couronne, & autres personnes notables de nostredict Conseil, Nous en attendant l'Edict general que voulons faire publier dans peu de iours sur les cahiers & remonstrances des Estats tenus à Paris, & les aduis qui nous ont esté donnez en l'assemblee de Roüen, Auons suyuant l'Arrest ce iourd'huy donné en nostre Conseil, dont l'Extraict est cy attaché sous le contrefeul de nostre Chancellerie, Reuocqué, & par ces presentes signees de nostre main, reuocquons à tousiours de nostre pleine puissance & autorité Royale, ladicte dispense des quarante iours, & droict annuel, sans qu'ils puissent cy-apres estre reestablis ou remis, en



quelque temps , ou pour quelque cause ou occasion que ~~ce~~ soit : nous reseruant neantmoins de recognoistre la vertu & les merites de nos officiers qui auront exercé leurs charges avec entiere reputation d'integrité & suffisance, soit de leur viuant en les promouuant en plus hautes dignitez , soit apres leur decés , en gratifiant sur le pris de leurs offices leurs vefues & enfans , au cas qu'ils viennent à deceder sans auoir resigné leurs Offices , ou qu'ils soient morts apres la resignation, sans auoir vescu quarante iours. Et pour le regard de l'interdiction de la venalité des Offices , apres auoir meurement consideré la perte que nos officiers pourroient souffrir, si elle estoit faite au mesme temps que le droit annuel est reuocqué : Encores que ce soit nostre intention d'y pour-

ueoir, comme le iugeans necessaire pour le bien-publicq, nous en auons neantmoins voulu differer l'execution pour donner encores quelque moyen & loysir à nos officiers de pourueoir à leurs affaires, & à nous aussi de trouuer le fonds pour remplacer la perte de nos parties casuelles: ce que nous ferons au plus tost qu'il nous sera possible. Si donnons en mandement à nostre tres-cher & feal le Sieur du Vair Garde des seaux de France, que ces presentes il face lire & publier en nostre grande Chancellerie, le seau tenant. Mandons en outre à nos amez & feaux Conseillers, Notaires & Secretaires, les grands Audianciars de France, & Controolleurs de nostredite grande Chancellerie, faire enregistrer lesdites presentes és registres de l'Audiance d'icelle, sans y faire aucune diffi-

culté. Car tel est nostre plaisir. En  
tesmoing dequoy nous auons faict  
mettre nostre seal à cesdites presen-  
tes. Donnees à Paris le quinzième  
iour de Ianuier, l'an de grace mil six  
cens dix-huict, & de nostre regne  
le huietième. Signé L O V Y S. Et sur  
le reply, Par le Roy. De Lomenie. &  
fellees sur double queüe du grand  
seau de cire iaulne. Et à costé dudit  
reply est escript,

*Leu & publié, le seau tenant, & re-  
gistré de l'ordonnance de monseigneur du  
Vair Garde des seaux de France, és regi-  
stres de la Chancellerie, par moy Conseil-  
ler Secretaire du Roy de ses finances,  
& grand Audiancier de France sous-  
signé. A Paris le seiziesme Ianuier, mil  
six cens dix-huict.*

Signé

DES PORTES.

Handwritten text in a cursive script, likely from a 17th-century manuscript. The text is arranged in approximately 15 lines, though many words are illegible due to fading and bleed-through from the reverse side. The script is dense and flowing, characteristic of the period.



















